

Монголын Үйлдвэрлэлийн Хөгжлийн Төлөө



Энэ дугаарт:

Nr. 3 / 2017

- Бизнес эрхлэгчдийн нийгэмлэг
- П.Баяржаргал: "...Бизнесээ өөр өнцгөөс хардаг болсон."
- Бизнес эрхлэгчдийн нийгэмлэгийн удирдах зөвлөл
- Сургалтын хуваарь
- Сургалтын сэтгэгдэл





С. Өнөрцэцэг

БPN Монгол салбарын
захирал

Бид Монгол дахь салбартаа бизнес эрхлэгчдийн нийгэмлэгийг үүсгэн байгуулж, үйл ажиллагааныхаа нээлтийг хийх гэж буйг дуулгахад таатай байна. Хөтөлбөр хэрэгжиж буй бусад улс оронд БPN Бизнес эрхлэгчдийн нийгэмлэгийн үйл ажиллагаа амжилттай хэрэгжиж байгаа билээ.

Тус нийгэмлэг нь жижиг, дунд үйлдвэр эрхлэгчдийн хооронд холбоо тогтоох, тэдний үзэл бодол, ашиг сонирхлыг нэгтгэх, ингэснээр бизнесийн үйл ажиллагаанд тулгардаг асуудлыг хамтран шийдвэрлэх, туршлагаа солилцох, харилцан бие биенээ дэмжих цаашлаад Монгол улсынхаа эдийн засгийн хөгжилд бодитой хувь нэмэр оруулах зорилготой юм. Нийгэмлэгийн шугамаар манай хөтөлбөрт оролцогчид цаашид сургалт, семинарт хамрагдах боломжтой. Бид гишүүдийнхээ эрх, ашиг сонирхлыг илэрхийлж хувийн хэвшлийн хөгжлийн дуу хоолой болж нийгмийн харилцаанд нөлөөлөхийн төлөө ажиллах бөгөөд ил тод байдал, чөлөөт зах зээлийн төлөө тууштай зогсох болно.

Үйл ажиллагааны чиглэл:

- Бизнесийн харилцаа холбоогоо өргөжүүлэхэд дэмжлэг үзүүлэх
- Бусад орнуудтай түншлэл, хамтын ажиллагааг дэмжих
- Олон улсын форумд хамтран оролцох
- Бизнестэй холбоотой мэдээллээр хангах, зөвлөгөө өгөх
- Ашиг сонирхлыг төлөөлөх
- Бусад холбоод, танхимуудтай хамтран арга хэмжээ зохион байгуулах
- Гишүүд хоорондоо үйл ажиллагаагаа танилцуулах
- Бизнес эрхлэгчдийн ажил хэрэгч байдлыг хөгжүүлэх, хөхүүлэн дэмжих
- Үзэсгэлэн яармаг болон хурал зохион байгуулах

Монголын эдийн засгийн хөгжилд хувь нэмрээ оруулах хүсэлтэй хөтөлбөрийн оролцогч бүр нийгэмлэгт гишүүнээр элсэх боломжтой. Удирдах зөвлөлийн гишүүд нь туршлагатай бизнес эрхлэгчид, БPN байгууллагын Швейцарь төлөөлөгчид мөн Монгол салбарын удирдлагаас бүрдэж байгаа. Бид хамтдаа байхдаа хүчтэй, тиймээс Монгол улсынхаа эдийн засгийн хөгжилд хамтдаа хувь нэмрээ оруулах боломж бид бүхэнд нээгдэж байна. Та бүхний өмнө бидний хаалга үргэлж нээлттэй байх болно.



П. Баяржаргал

“Их Газрын Чулуу” ХХК
-ийн гүйцэтгэх захирал

Манай “Их газрын чулуу” ХХК нь 2002 онд анх байгуулагдахдаа 10 ширхэг оёдлын машин зээлээр авч үйл ажиллагаагаа эхлүүлж байсан бол өдгөө ажлын хувцасны хоёр салбар үйлдвэр, ажлын хувцасны бөөний төв, ширмэл дулаалгын үйлдвэр гэсэн чиглэлээр үйл ажиллагаа явуулж байна.

Бид байгуулагдсан цагаас хойш олон жилийг үр бүтээлгүй өнгөрөөсөн юм шиг санагддаг. Учир нь бид өмнөх ажилдаа анхаарлаа хэт хандуулаад, харин сургалт болон хүний хөгжлийг хойш тавьж ирсэн. Харин 2014 оноос бид БPN-ийн хөтөлбөрт хамрагдсанаар бизнесийн удирдлагын суурь мэдлэг олгох сургалтуудад сууж, компанийхаа алсын хараа ирээдүйг зөв тодорхойлж, эрхэлж буй бизнесээ өөр өнцгөөс хардаг болсон билээ.

Ханс Вилхэлм багшийн сургалтад хамрагдсанаар компаниа хэрхэн зөв удирдаж, үр бүтээлтэй ажиллах талаар их зүйлийг мэдэж авсан бөгөөд энэхүү сурсан мэдсэн зүйлээ өдөр тутмын үйл ажиллагаандаа хэрэгжүүлснээр бодит эерэг өөрчлөлтүүдийг гаргаж чадсан. Мөн сургалтуудаас өнөөдрийн олж буй ашгаас илүү ирээдүйд нэмүү өртөг шингэсэн үнэ цэнийг бий болгох нь чухал гэдгийг маш сайн ойлгосон. Энэ утгаараа БPN манай компанид асар том хөрөнгө оруулалт хийсэн гэж хэлж болно.

БPN-ийн бүх сургалтуудад би өөрөө суусны дараа менежерүүдээ одоо хамруулж байна. Манай нэг ажилтан “4 жил сураагүй мэдлэгээ БPN-ийн 4 цагийн сургалтаас олж авлаа” гэсээр ирсэн нь БPN-ийн сургалт ямар үр өгөөжтэй, бидний өдөр тутмын үйл ажиллагаанд хэрхэн нөлөөлж байгааг илтгэж байна.

Бид борлуулалтын сувгаа өргөжүүлж шинээр өөрийн нэрийн барааны хоёр дэлгүүрээ нээн бүтээгдэхүүнээ амжилттай борлуулж байна. Мөн монголдоо анх удаа ширмэл хийх үйлдвэрийг хатгамлын үйлдвэрлэлтэй хослуулан ашиглалтанд оруулсан. Өмнө нь бусдаар хийлгэж байсан үйлдвэрлэлийн дамжлагыг бид өөрсдөө хийгээд зогсохгүй бусдын захиалгыг авч гүйцэтгэдэг болсон.

Энэхүү завшааныг ашиглаад эх орныхоо хөгжилд өөрсдийн хувь нэмрийг оруулж буй баялаг бүтээгч бүх жижиг дунд бизнес эрхлэгчид болон БPN-ийн хамт олон та бүхэндээ ажлын өндөр амжилт хүсье! Та бидний хүчин чармайлт оролцоотойгоор “Үйлдвэрлэгчид нь сул дорой, наймаачид нь хүчтэй байгаа” энэ буруу тогтолцоог халж, Монгол улс маань хөгжин цэцэглэх болно гэдэгт итгэж байна.



Д. Оргилмаа “Сантис Эджукэшнл Сервисис” ХХК-ийн захирал

Эрхэм хүндэт бизнес эрхлэгчид ээ,

Юуны өмнө BPN-ний үндсэн зарчимд тулгуурлан бид албан ёсны Бизнес эрхлэгчдийн нийгэмлэгтэй болж байгаа энэ сайхан мэдээг та бүхэндээ дуулгахад таатай байна.

Монголын бизнес эрхлэгчдийн дунд BPN-ний Ханс Вилхелм захирлыг алс хол Швейцарь орноос ирж сургалт хийхийг хүлээдэг хүмүүсийн тоо жил жилээр нэмэгдсээр даруй зургаан жил болжээ. Миний бие, тэдний нэг нь бөгөөд BPN-ийн хөтөлбөрт хамрагдсанаас хойш бизнесийн удирдлагын суурь мэдлэг олгох бүх сургалтуудад хамрагдаж “Бизнесийн удирдлага” – ын Магистр зэрэгтэй дүйцэхүйц мэдлэгээр өөрийгөө цэнэглэж чадсан гэж үздэг. Анх 1999 онд бизнесийн салбарт хөл тавьж итгэл, сэтгэл, зүтгэл гарган бизнесээ удирдаж явсан он жилүүдийг эргээд харахад хэрхэн энэхүү зах зээлд тогтвортой үлдэж чадсан юм бэ гэж бодогдох үе байдаг. Хөдөлмөрийн араас амжилт дагана гэдэг үг өнөөдрийн зах зээлийн ширүүн шуурганд нийцэхээ больсон мэт санагддаг. Өнөөдөр бид бизнесээ мэргэжлийн түвшинд удирдахад ухаалаг удирдлагын тогтолцоо, стратеги төлөвлөлт, хэрэглэгч, зах зээл рүүгээ хандсан судалгааг хийхгүй бол зах зээлийн ширүүн шуурганд бүдрэхэд амархан болсон байна.

Бид дэлхийн хөгжингүй орны бизнесийн загваруудаас суралцаж, эрдэм мэдлэг импортлон бизнесээ удирдах ур чадвараа хөгжүүлж, гадны брэнд, олон улсын франчайз бүтээгдэхүүн, үйлчилгээг зах зээлдээ шууд нэвтрүүлж, орчин үетэй хөл нийлүүлэн алхах боломжийг хэрэглэгчдэд олгож, тэдний хэрэгцээ, шаардлага, сонголтыг улам өргөн болгож ирсэн. Манай орны аль ч салбарын хувьд гаднаас суралцаж, үлгэр дуурайлал авч хөгжин дэвшиж байгаа хэдий ч бусдыг даган дуурайхаас илүү өөрийн гэсэн замналыг тодорхойлж, шинийг эрэлхийлж дэлхийд шинэ бүтээгдэхүүн буй болгох бүрэн боломж бидний өмнө нээлттэй байна. Харин ийм хөгжлийн шатаар хамтдаа алхаж зөвхөн үндэсний хэмжээнд тэргүүлэх бүтээгдэхүүн гаргаад зогсохгүй, дэлхийд танигдах

Монгол брэндийг гаргахын төлөө бид хамтдаа нэгдэж ажиллах нь туйлын чухал байна.

Нэгэн дээвэр дор зогсох гэж байгаа маань бидний эхлэл болж, бие биеэ түшиж хамтдаа байх нь багаараа урагшаа алхах боломж олгож, харилцан ашигтай хамтын ажиллагаа маань бидний амжилтыг дагуулах алтан дүрэм нь байна гэдэгт итгэлтэй байна.

Манай нийгэмлэгийн эрхэм зорилго бол гишүүд харилцан бие биедээ тусалж, дэмжин хамтран ажиллаж, бизнесээ мэргэжлийн түвшинд удирдах ухаанд хамтдаа тасралтгүй суралцахад чиглэгдэнэ.


Мөн тус нийгэмлэг нь Монгол улсын эдийн засаг, “Монголд үйлдвэрлэв” бүтээгдэхүүний хөгжлийг дэмжин, нийгэмлэгийн бизнес эрхлэгчид маань өөр хоорондоо туршлага солилцож, дотоодын бүтээгдэхүүн, үйлчилгээний өрсөлдөх чадварыг дээшлүүлэх зорилготойгоор дотоод, гадаадын мэргэжилтнүүдтэй мэдлэг, туршлага солилцох нөхцөлийг нь бүрдүүлэн ажиллана.

Миний хувьд энэхүү нийгэмлэгийн удирдах зөвлөлийн даргаар сонгогдон, бизнес эрхлэгчдийнхээ дуу хоолой, үзэл бодлын илэрхийлэл болон тэдний итгэлийг хүлээж ажиллах болсондоо таатай байна.

“Бизнес эрхлэгчдийн нийгэмлэг” - т нэмүү өртөг шингэсэн эцсийн бүтээгдэхүүн үйлдвэрлэж буй BPN-ийн хөтөлбөрийн оролцогч бүр гишүүнээр элсэх боломжтой бөгөөд Удирдах Зөвлөлд маань туршлагатай олон жил амжилттай бизнес эрхэлж буй бизнес эрхлэгчид болоод BPN-н төлөөлөгчдөөс бүрдэнэ.

Эх орныхоо эдийн засагт хувь нэмрээ оруулах эрхэм зорилготой бизнес эрхлэгчдэдээ эрдэм мэдлэг, оюун бодлоо дайчлан бидэнд тулгарах аливаа бэрхшээлийг хамтдаа сөрөн, бат бөх хамтын ажиллагаатай байхыг хүсье.

Сургалтын хуваарь



Хамт олноо удирдахуй
2017.11.08-11.11 /4 өдөр/

Агуулга: Удирдагчийн үндсэн зарчмууд: хариуцлага, мотиваци, бүтээлч сэтгэлгээ, алсын хараа ба зорилго, удирдлагын мэдээлэл боловсруулалт, удирдлагын харилцаа, зөв шийдвэр гаргах, ажилтнуудтай хийх уулзалт, ур чадварын үнэлгээ, хувь хүний зан чанар ба хүнийг таних чадвар, DISG зан чанарын загвар, хувь хүний зан чанарт тохируулан харьцах, хэлэлцүүлгийг үр дүнтэй явуулж, багаар ажиллах нь гэх мэт.



“Эрдэнэ Дизайн” ХХК-ийн захирал Л. Хаш-Эрдэнэ:

BPN –н сургалтуудад сууснаар манай байгууллагын хувьд хөрөнгө санхүүгээ хэрхэн зөв зохицуулах, компанийхаа ашиг алдагдалд анализ дүгнэлт хийх, түүндээ тулгуурлан орлогоо нэмэгдүүлж зарлагаа хэрхэн бууруулах тал дээр түлхүү анхааран ажиллах болсон.

Борлуулалтаа нэмэгдүүлэхийн тулд бүтээгдэхүүнийхээ үнийг зөв бодитоор тогтоон, хэрэглэгч үйлчлүүлэгчидтэйгээ зөв зохистой харьцах, ажилтан албан хаагчдаа зөв удирдаж нөөц боломжиндоо тулгуурлан ажиллаж, мөн урамшуулж хөдөлмөрийн бүтээмжийг нь дээшлүүлэх, цагийг зөв үр ашигтай зарцуулах гэх мэт маш олон ойлголтуудыг мэдэж авсан.


Сургалтын багш зөвлөхүүд нь өндөр хөгжилтэй улс орны амжилттай байгаа бизнес эрхлэгчдийн туршлагаас хуваалцаж зөвлөгөө өгдөг нь бидэнд маш их хэрэг болдог.

Сургалтанд суусан манай ажилтнууд болон миний хувьд Ханс Вилхэлм –н зөвлөгөө, ёс зүйн зарчмыг хэрэгжүүлэх нь зөвхөн өөрийн байгууллагыг үр ашигтай ажиллуулахаас гадна улс орны маань нийгэм, эдийн засаг болон бидний ирээдүйд ямар их хэрэгтэй болохыг ойлгосон.

Монголын жижиг дунд бизнес эрхлэгчдийг амжилтанд хүргэхийн төлөө ажиллаж байгаа BPN – н хамт олон болон багш нартаа маш их талархаж байна.

Сургалт болон хөтөлбөрийн талаарх дэлгэрэнгүй мэдээллийг манай вэб хуудаснаас авна уу.

WWW.BPN.MN



Хаяг: СБД, 8-р хороо, Оюутны 33
"ТАНАН" төв, 404 тоот

Утас: 77113309, 70113309

Э-шуудан: info@bpn.mn